

05 DEC 1998

DR MAHATHIR LANCAR PERAHU LAYAR JALUR GEMILANG

LANGKAWI, 5 Dis (Bernama) -- Perdana Menteri Datuk Seri Dr Mahathir Mohamad hari ini melancarkan perahu layar "Jalur Gemilang" menandakan kesediaan pelayar tempatan Azhar Mansor untuk belayar mengelilingi dunia pada penghujung Januari depan.

Azhar, 40, yang berasal dari Perlis akan cuba memecahkan rekod dunia pelayaran tanpa berhenti selama 105 hari yang kini dipegang oleh warga Perancis, Christophe Auguin.

Jika Azhar berjaya beliau akan membuat dua rekod dunia - pertama belayar secara solo tanpa berhenti di laluan baru yang ditentusahkan oleh Majlis Rekod Kelajuan Pelayaran Dunia (WSSRC), United Kingdom dan keduanya - memecahkan rekod dunia sekarang ini.

Percubaan Azhar akan bermula dari Langkawi ke Lautan Hindi, Pasifik dan Atlantik kemudian balik ke Langkawi melalui lima tanjung di selatan benua sebelum belayar ke arah utara sehingga ke Brazil untuk menamatkan jarak 21,600 batu nautika seperti yang dihendaki oleh WSSRC dalam mengemudi mengelilingi dunia.

-- BERNAMA

NH PR